

Pauro Titu bo ziwatahaka

Titu kino niwatihi Pauro tuk zinymyrykyta. Titu itsikzikdihi Sipire inarokota anaeze hi Sesus tuktsa nisipokzitsiki. Pauro papeu humo zispirikpokozi. Deus Pauro ziapewywyky iwatahi katsa kino niwatihi tanymyryky.

¹ Uta Pauro. Titu bo piwatahaka. Utakta Deus ykzoho my. Sesus Kiristu zikpeha ahabo iwatahi pahahyrinymyryky. Iwaze Deus kape niy:

– O ikia awatawyhyta tsihyrinymyrykta. Iwatahi Sesus humo mysispirikpotohi. Iwatsahi amy ty wasani my sihyrinymyrëtsa. Iwa kaharere bo hyÿ mahaze mozurukunaha – niy.

² Deus ykparawy zuba anatyhi yhyÿ tsimahaze mywahi ibaze tsimynapykyknaha. Iwatsahi iharere bo hyÿ tsimaha. Tapara Deus mybarawy izuknihibyize atahi:

– O asaktsa kawatawyhytsa kabaze mynapykyknaha. Sisipitu tahawahi kabaze mynapykyknaha – iwa mysoho ty niy. Deus harere zuba wasani mynakara. Batu mybarapetu ziky.

³ Kyze utakta Deus harere bo hyÿ myze iwazehi iharere motsasoko. Iharere Sesus soho kytsa sizubarëtsa bo motsasoko. Deus zikpeha iharere motsasoko. Deus zikpehata hi hyÿ icy iwatahi ikiahatsa bo motsasoko, Deus mymyoktyhyrykta naha soho humo mykara.

⁴ Titu bo piwatahaka. Ikia katse wata tsikyzyk. Katsaktsa Sesus humo myspirikporëtsa Deusta

myzo. Sesus Kiristu mymyoktyhyrykta. Iwaze Deus bo atsyhyryze mopamykysokoze ipe my:

– O myzo Titu tsipokzitsikikta, iwatahi mytsaty mytsaty byri my. Sesus Kiristu humo tsakurēta mozik – my. Iwa atsyhyryze Deus bo mopamykysoko.

Titu hyriziktsokzawy soho.

⁵ Kereta tsikzikdihi sihezōnike taeze. Anaeze tarabaja tsimykara. Uta ikia tuk tarabaja tsikykarannahaze batu ipykba. Myhyriziktsokzawy batu ipykba tsikaha. Iwaze uta Kereta tsikzikdihi ekze niparak. Iwatahi mytarabaja tsipykbata. Ikia hi myspirikpokotsa tysiawatawy asahi Sesus tuktsa tysiny. Iwaze Sesus tuktsa tysitsumuēhīnaha. Mysihyrinymyrykynaha maha. Kytsa hudikhudikwy taba paikpa tsimykara myspirikpokotsa tysiawatawy. Hawa abo botu iktsaso atsatu tsimykara. Iwa tsimy.

⁶ – Sesus tuktsa myspirikpokotsa wasani mykarakta! tsimy. Kytsa sizubarētsa isoho tyhi:

“O tahi wasani my” – mykaranaha. Atakta ikahatatsahi zuba ioke. Ihyrytsa Sesus harere bo hyỹ mykaranaha. Kytsa ihyrytsa soho motsasonaha zeka:

– O ihyrytsa batu simysapy maha. Tahazo harere bo batu hỹ maha – nikaranaha atahi ba ziwatawy. Atahi Sesus tuktsa myspirikpokotsa tuk ba zitasapy.

⁷ Myspirikponahatsa Sesus tuktsa tuk Deus tsyhyryze tarabaja mynakara. Deus hyriziktsokzawy humo. Wasani mykarata iwaze kytsa ihumo batu siharerewabymybara. Atahi batu tyso:

– Uta zuba kahyrinymyrēta ba ziky – nikara. Sesus tuktsa myspirikpokotsa batu sisakpare. Atahi tsōsī kasasa ba ziku. Ba zikokyknaha. Okyrysaro tsihitsa ba zikyziknaha. Ba mybarapetu ziky. Iwa mozuruku.

⁸ Ata kino kytsa iwahoro bo mozumukunahaze atahi:

– O pakutyny tsimy. Kabaze dyhy tyny – my. Amy ty wasania ty ana kino iakparawy zuba. Kytsa bo pisapywyky. Kytsa bo wasani isopyk mykara. Ata kino Deus harere bo hyŷ mykara. Tapetu isopyk iwaze amy ty takparawy zuba batu mynakara. Iwatahi wasani mozuruku.

⁹ Deus harere humo tispirikporēta. Deus harere wasani baba mytsaty mynakara. Iwatahi Deus harere tuk ba zimi. Deus harere mysihyrinymyryziuku. Amy soho Deus harere humo ziwaby anatyhi mysihyrinymyryky. Deus harere humo tsihyrinymyrēta. Kytsa Deus harere tsikaeni zuba siakparawy mysihyrinymyryky. Iwatsahi Deus harere bo hyŷ mynakaranaha. Kytsa Deus harere humo batu sispirikpo asahi mysihyrinymyry iwaze iharere bo zuba hyŷ mykaranaha tsiky.

¹⁰ Iwaze kytsa sizubarētsa Deus harere bo batu hŷ mykaranaha. Asahi Sudeutsa maha. Myharere bo yhŷ zikahabyikitsa. Mopamykysoikiknaha zuba. Siharekykarētsa Deus harere soho humo mybarapetu mykaranaha.

¹¹ Tysiharerepykikta. Niwazubakta tsimy. Asahi tatukytsa nisiaknikinaha amy ty batu wasani my ana humo kino mysihyrinymyryknaha. Iwatsahi situkytsa Sesus harere bo batu

hỹ maha. Asaktsa batu sisikpyby maha. Asahi okyrysaro zuba siakparawy. Okyrysaro humo zuba mysihyrinymyrykynaha. Iwatahi ikia tysiharerepykwy niwazubakta tsimy.

¹² Kereta tsikzikdihi taparakta tihi:

— O Kereta ezektsa simyspihikbatarẽtsa maha. Mybarapetu ziknakaranaha. Sakyriukrẽtsa maha. Tahadisahawy humo zuba mynakaranaha. Batu sipasaratsihik — niy.

Iwa Kereta ezektsa soho nitsasoko. Atahi Kereta ezekta niwatihi iwatuze tatukytsa soho nitsasoko.

¹³ Iharere wasani my. Kereta ezektsa asahi batu simysapy maha. Iwatahi Titu ikia tysibetsak tsimysipeha:

— Tysoso byitaha — tsimy. Asaktsa siharere piwabyikiknaha tysibetsak. Iwaze siharere wasanibara ana hi mopykba. Iwazehi Sesus humo sispirikporẽtsa babatsa moziknaha.

¹⁴ Iwaze Sudeutsa taparaktsa harere batu ahawabyhy niakbakaranahatsa harere batu ahawabyhy. Siharere wasanibara humo iwatsahi batu ahawabyhy. Kytsa harere batu wasani my asaktsa zimyikinahatsa siharere bo batu yhỹ maha iwahahi siharere kino batu ahawabyhy. Atukytsa ispe:

— Siharere bo ka waby waby byitaha — tsimy.

¹⁵ Asahi wasani mykaranaha. Simysapyrẽtsa moziknaha. Hawa mozurukunaha tisapyrẽna bo zuba iktsa mykaranaha. Asaktsa batu imysapy mykaranaha. Sisopyksapybyitsa tu mykaranaha. Hawa mozurukunaha pisapybyikinaha. Imysapybara bo zuba iktsa mykaranaha. Asahi Sesus humo batu sispirikpo. Deus tihi:

– O anahi wasani – my. Ana humo hi batu sihyrinomyry. Deus tihi:

– Anahi batu wasani – my. Anatyhi batu sihyrinomyry. Imysapybara zuba ana bo mytsaty mykaranaha.

¹⁶ Asa tihi:

– Katsaktsa Deus soho humo myhyrinomyrëtsa – mybarapetu mykaranaha. Hawa mozurukunaha Deus tyryktsa byitsa watsa mykaranaha. Deus harere humo batu hỹ zikaha. Kytsa ustsahumo tahakyrikinaha. Deus humo batu siakparawy. Wasani baraty ziknakaranaha, isapybara ty ziknakaranaha iwatsahi Deus soho humo batu sihyrinomyry.

2

Hawa ha ty ahyrinomyry naha ty atsatu tsimyкта.

¹ O Titu ikia sisopyksapybyitsa humo pykyhytuty. Ikia mekywata tu tsimykara. Amy ty wasania ty zuba Sesus tuktsa tysihyrinomyry. Deus harere ty tysihyrinomyryky iwaze iharere bo hyỹ mykaranaha. Iwa tsimyzurukunaha.

² Ikia sitsaikbatsa pe tsimy:

– O kytsa tsõsĩ ty ka tsõ tsõ byitaha tsimy. Ahapyrirybyihu ja. Wasani zuba tynakaranahaktsa. Sesus humo ahaspirikporëtsa tsimoziknaha. Ustsahumo kytsahumo tynaharape pokzitsikinahaktsa! Iwahumokytsahumoky ahakubyrisoroku ja. Iwahumokytsahumoky tsimyzurukunaha zekahumokytsahumoky tsimoziknaha – tsimy.

³ Tsimytsasoko wytykyryk sistsaikbaza pe kino niwatihitsimy. Ispe tsimy:

– Ikiahaka kino Deus harere bo hyĩ taha. Kytsa sizubarẽtsa soho ahaharerewabymybara byihuja. Tsõsĩ ty ka tsõ tsõ byitaha. Ikiahaka wasani haty zuba tynasihyrinymyrykynaha – tsimy.

⁴ Tapara kykyrky sipyitsahazytykza mysispirikponaha. Asiza hi:

– Ikiahaka katsa mywa ahapyitsa tynasipokz-itsikinaha ahahyrytsa humo kino niwatihi tynasipokzitsikinaha – tsimy.

Iwa wytykyryk taparakykyry sipyitsahazytykza mysispirikponaha. Taparakykyry ypykyhyza pe tihi:

⁵ – Ikiahaka wasani tsimahaktsa! – maha. Ahamysapyrẽtsaktsa! Usta maku bo ka hua hua byitaha. Ahawahoro ezektsa humo ahamypokzitsiukuktahaktsa. Ahapytsa harere bo yhy tynakaranaha. Iwa taparakykyry ypykyhykza wytykyryk mysispirikponaha. Iwa mozurukunaha zeka ustsisa soho humo maha:

– O Deus harere wasani kok my maha. Aty tohi iharere bo hyĩ my zeka wasani mykaranaha – maha. Batu aty tohi Deus harere ba zisohometunaha.

⁶ Atsatyty siypykyhydytyktsa pe tsimy:

– Ahasakparebyihu ja! Wasani tynakaranaha – tsimy.

⁷ Titu ikia kino tsipisapywyky. Niahatsahi ustsisa kytsa ikia watsa pisapywykynaha, iwaze hi asa kino pasopykzukunaha. Amy ty wasape haty zuba mysihyrinymyryky. Iwa mysihyrinymyry zeka wasani zuba mytsaty tsimykta. Ba zimyi. Deus harere isapyrẽnikia tyzuba asopyk.

⁸ Aharere ty wasani zuba tsimykta! Deus harere humo mysihyrinymyryikik iwatsahi kytsa ikia batu siakparawy asoho pisohometu tsihikiknaha ba zikaha. Aharere soho pisapybyrikyzykynaha. Aharere wasani tsimy zeka iwaze sisikpybyrëtsa. Aharere tisapyrëna humo sisikpybyrëtsa moziknaha.

⁹ Kyze kytsa asahi tarabajaziu mykaranaha batu okryrsaro humo sibo nynyhukbyitsa iwatsahi asaktsa usta tsumuëhïtsa zubata. Asa pe tsimy:

– Ahakzohotsa atahi okryrsaro humo ahabo nynyhukbyitsa. Iharere bo hyÿ tsimykaranaha. Hawa sa iakparawy humo zuba tsimykaranaha. Ihumo batu ahakyri! Batu ahaokanihuk – iwatsahi ahahumo tsakurëta mozik.

¹⁰ Inamy ty ka aokok aokok byitaha. Ikiahatsa tarabajaziu tynakaranahaktsa kytsa. Tarabaja tsizubarëna iwatsahi kytsa ahasoho tihi:

– O asahi tarabajaziu nikaranaha asahi Deus harere bo hyÿ nikaranaha iwatsahi Deus harere wasani my. Deus harere humo tarabajaziu nikaranaha – maha tsimy.

¹¹ Deus mype niy. Aba pahasapywyky iwatahi kytsa sizubarëtsa zipehata bo mysioktyhyk. Ikiahatsa kabo myzahaoktyhyryk.

¹² Iwaze Titu ikia hi kytsa tysihrinymyryky. O Sesus tuktsa imysapybara ka tsimoewynahaktsa! Kytsa ykparawy, asahi Sesus humo sispirikpobyitsa ana kino tsimoewynahaktsa! Iwatsa tu wasani tsimyzurukunaha. Abaktsa kytsa okzeka wasani tsimyzurukunaha niwatihi. Deus yk-

parawy ty zuba hyĩ tynakaranaha. Anabo hi zuba hyĩ tynakaranaha.

¹³ Iwa tsimyzurukunaha. Katsaktsa tsipiperykynaha. Katsaktsa mymyoktyhyrykta myziksizo naha humo taperyky. Taperykynahatsa hi mykurẽtsa tsimykaranaha. Sesus Kiristu myziksizoze kytsa sizubarẽtsa ipe maha:

– O Deus ikia tsamysapyrẽta – my. Deus zuba wasani my. Iwaha mozumuze mymyoktyhyrykta myziksizoze tisapyrẽna hỹ maha.

¹⁴ Sesus Kiristu mysapyzekenihyrikosokda. Iwatsatu katsa mysapybara humo Deus mymyokzo ihumo hi mysapybyi tamoewy. Sesus nihyrikosokdaze iwatsahi mysapyrẽtsa tsimozikanaha. Ityryktsa tsimoziknaha. Iwatsahi tisapyrẽna ty zuba tsimykaranaha hỹ.

¹⁵ O Titu iwa ikia Sesus tuktsa bo tsimytsaso. Mysisapywy. Mysihyrinymyryikik. Sisopyksapybyitsa mykaranaha zeka tysibetsak. Ispe tsimy:

– Niwazubaktsa ahamysapybara ty pyktaha – tsimy. Aharere piwabynaha. Aharere pykyhytu piwabykynaha. Aharere tsikaeni zuba piwabykynaha zeka ispe tsimy:

– Kaharere bo wabytoktotaha. Sesus Kiristu hi botu zikpeha iwatahi ahabo motsasoko iwatsahi kaharere tsiwabytoktonaha – my. Iwa. Pauro Titu bo ziwatahaka.

3

Titu Sesus tuktsa bo motsasoko.

¹ Ikia hi:

– O ahapehatsa harere bo hyĩ tynakaranaha. Sitsumuẽhĩtsitsa harere bo kino niwatihi hyĩ tynakaranaha. Pahapehanaha zeka tarabajaziu tsimaha. Tsisapybanaha ana tarabaja tsimahaktsa kytsa – tsimy.

² – Utsa kytsa soho humo ba ahaharere-wabymybarahuja tsimaha. Ikiahatsa humo ka batu mykyriuk. Kytsa sizubarẽtsa humo taharape pokzitsikinahaktsa tsimaha. Iwa kytsa bo ahasopyk tsimaha – tsimy.

³ Tapara kino katsa Deus harere bo batu hyĩ mysopyk. Kytsa kino niwatihi nimymyikiknaha. Myzokdiarẽtsa tsikykaranaha. Katsa mykparawy ty zuba atsatu tsikykaranaha. Katsa imysapybara ty zuba tsikykaranaha. Anatyhi tsikykaranaha batu mypetu mysopyk. Kytsa myhumo tahakyrikinahaze katsa kino niwatihi sihumo tsikmykyrikinahaha, iwa kytsa humo mysopyk.

⁴ Deus mymyoktyhyrykta. Hawa myhumo nimypokzitsiki nimywatawy. Ata kino mymyoktyhyryk.

⁵ Katsaktsa wasani ahabyitsa tu tsikykaranaha iwatatu nimyoktyhyryk. Katsaktsa batu mysopyksapy iwatatu nimyoktyhyryk. Ata zuba mymypokzitsiki iwa humo namykse. Ihyrikoso mymysapybyri humo mymyokzohik. Aba wasani tsimaha. Taparaka katsaktsa myzotsa hyrytsa zubatsa. Abaka ba. Katsa Deus hyrytsa tsikyziknaha. Mopurukzonahaze tsawatsa. Taparaka imysapybara ty tsikykaranaha. Abaka ba, Deus hyrikoso humo wasani tsimykaranaha.

⁶ Deus hyrikoso mytuk mynapykyryk. Deusta isorokbyita babata katsa mybo tahyrikoso ty nyny

niy. Sesus Kiristu mymyoktyhyrykta. Iwatahi Deus hyrikoso mybo zipeha mytuk mynapykyryk.

⁷ Deus hi tahyrikoso zipeha atahi mytuk mynapykyryk. Sesus Kiristu humo zuba wasani tsimyzurukunaha. Iwaze Deus mysoho humo niy:

— Kaokzeka wasani tsimaha. Ahawahi kabaze tsimynapykyknaha — niy. Abaka ana hi taperyknaha. Mykurētsa. Katsakta Deus tuk mywahi tsimynapykyryknaha ana hi taperyky.

⁸ Amy ty abo iktsasoko wasani my.

Atukytsa bo tsimytsasokta! Amy ty abo iktsasoko atsatu atukytsa Deus humo sispirikporētsa bo tytsasokokta. Tyzibytuhukutu mysisapywyknaha. Mysisapywyknaha zeka ustsakyttsa mysitsumuēhīkīnaha. Iwa tsimahaze Deus ahahumo tsakurēta mozik. Iwa tsimyzurukunaha.

⁹ Kyze kytsa asahi mopamykysoikiknaha zuba. Siharerewabymybarētsa maha. Asahi taparakttsa harere soho ty mopamykysoikiknaha. Asahi taparakttsa soho piwataha tsihikiknaha.

— O aty sa mydiritsa sinaro tsipiwatahakanaha — mykaranaha ana soho hi mopamykysoikiknaha. Moises harere humo kino niwatihi mopamykysoikiknaha. Iwa tahapetu nikaranaha siharere ty batu pykyhytu waby zikaha. Siharere bo batu hỹ tsimy. Siharere humo kytsa ba ziksitsumuēhīnaha iwatatu batu awabyziuhu. Asahi mopamykysonaha zuba.

¹⁰ Ustsakyttsa Sesus tuktsa mysihyrinomyryknaha. Amy ty imysapybara ty mysihyrinomyryknaha. Katsakta myhyrinomyrētsa mybarapetu

mykaranaha iwatsahi Sesus tuktsa mysimiyi-wykynaha. Deus harere tsikaeni zuba mysiwaby tsihikiknaha. Ikia hi tysibetsakak. Ispe tsimy:

– Batu tyso. Imysapybara ty batu tyso. Niwazubakta. Pyk tsimy – tsimy. Isty hyrinymyry ahabyizeka tysibetsakakzo.

– Batu tyso. Amy ty kino imysapybara kino ba ziktsaso – tsimy. Aharere ty waby byizeka situk ka pão pão byity. Batu situk tsimynapykyryk my.

¹¹ Ikia kino sisoho humo tsahyrinymyrëta. Hawa sisopyksapybyitsa ziknakaranaha humo tsahyrinymyrëta. Deus harere bo batu ma zikaha. Imysapybara ty zuba mynakaranaha. Asahi isopyksapybyitsa mykaranaha ana humo hi sihyrinymyrëtsa iwatsahi kytsa sizubarëtsa sisoho:

– O asaktsa simyihitsa mynakaranaha – mykaranaha.

Abaka pepykbahaniki.

¹² Kyze Aretemas abo pipeha. Tyzeka ja Tikiko abo pipehaka. Aty ja pipeha batu kanyhy. Myzumuze aidykta ikia Nikoporis bokta tsimy. Anaeze kabo tsimykozoreze. Nabo hyritsik pokteze zuba mynapykyryk.

¹³ Kytsa petoktsa maha. Atuk tu maha. Estuba Aporo inarokota. Usta Senas inarokota. Atahi kytsa harere humo pitsumuëhëkik. Petoktsa motururuknahaze ikia anamy ty sibo nyny tsimy. Mykurunahaze sidisahawybyitsa tu iwaze adisahawy ty sibo nyny tsimy.

¹⁴ Sesus tuktsa pe tsimy:

– O tsisapybakanahaktsa kytsa! Ahanamy ty sinamybyitsa bo nynytahaktsa. Wasani tahaktsa kytsa. Tarabajaziu tahaktsa! Iwa tsimyzurukunaha – iwa ape my.

¹⁵ Kytsa katuk ahumo sihyrizikbarëtsa mynakaranaha. Atukytsa pe:

– Uta Pauro ikiahatsa humo kahyryzikbarëta.

Deus pahasapywyky.

Deus bo mopamykysoze uta tihi:

– O Deus Titu ituktsa sihumo tsimypokzitsiukrëta tsimy – my. Iwa Deus bo ahatsyhyryze mopamykysoko. De. Iwa ziwatahaka Titu bo nepyk.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

2f0260ea-5969-5180-9ac5-183d63a989f1